



Umhlangano wemndeni

African Storybook

Thulisile Shongwe






Sinemhlangano wemndeni.

Kukhona Babe, Anti Pula, Malume Chavani,
Eddie, Attie, mine, kanye naGogo.

Ngimi lomncane kunabo bonkhe.



Ekhaya kuhlale kudlala umsakato 24/7. Sihlale silalele tindzaba.

Lamuhla sive kutsi tikolo titovulwa evikini lelitako.



Bese kuphele tinyanga tikolo tavalwa ngenca ye-*Lockdown*.

Babe ucala kukhuluma, “Mndeni wami, kufanele sente sincumo mayelana nekubuyela kwebantfwana esikolweni.”



Anti Pula ukhatsatekile. "Kuvulwa kwetikolo kusho kutsi sekutawutseleleka bantfu labanyenti.

Lesifo sitawubhebhethseka kakhulu manje," aphawula.



Attie utsi, "Mine ngesaba kungenwa ngulesifo.

Asilindzeni emaviki lamabili sibone kutsi tintfo titawuba njani esikolweni. Kusenekudideka lokunyenti ngalendzaba."



Babe utsi, "Mine ngesabela Gogo.


Bantfwana nabangatfola leligciwane bese
baliletsa lapha ekhaya, yena utawugula
kakhulu."

Gogo uvuma ngenhloko.



Gogo sewugugile. Unesifo sashukela kanye
nesifo senhlitiyo.

Ngiyesaba kakhulu. Ngikhatsatekile ngemndeni
wakitsi.



Malume Chavani utsi, “Mine ngicabanga kutsi kuncono bantfwana bahlale ekhaya, kute sivikeleke. Asesicale sibone kutsi tikolo setikulungele yini kwemukela bafundzi.”

Wonkhe umuntfu uyavuma ngaphandle kwa-Eddie.



“Mine kufanele ngiye esikolweni semabanga laphakeme emnyakeni lotako.

Angati nobe ngitawukwati yini kuwucedza umsebenti lekufanele ngiwufundze.

Lokufundza ku-inthanethi angikutsandzisisi kahle,” kusho Eddie.



Mine angikhatsatwa kusalela emuva
emsebentini wesikolwa.

Ngikhatsatwa yindzaba yebuntfu.
Sesitawuphatsana njani manje?

Kufanele silwisane nalesifo ndzawonye.

—Imibuto

1. Bhala inchazelo yalamagama:
kutseleleka, kuguga, kuvikeleka,
buntfu.
2. Chaza loko lokushiwo 'kukhatsatwa
yindzaba yebuntfu'.
3. Ucabanga kutsi ngusiphi sincumo
umndeni lofinyelele kuso? Kungani?
4. Umndeni wakho wakhiwa bobani?
5. Wativa kanjani ngesikhatsi
uphindze uhlangana nebangani
bakho basesikolweni ngemuva
kwe-*lockdown* ye-Covid-19?
6. Ngaphandle kwesifo sashukela,
ngutiphi letinye tifo letine
letingehlisa emasotja emtimba
wemuntfu?
7. Ngutiphi tincumo lotenta malanga
onkhe?

Lencwadzi yetindzaba isekelwe embikweni wesiteshi semsakato lokutsiwa yi-RX. I-RX Radio siteshi semsakato sebantfwana lesiku-intanethi, lesisungulwe saphindze sakhelwa bantfwana.

I-RX Radio isakatela e-Red Cross War Memorial Children's Hospital eKapa.

I-RX Radio isita bantfwana bacoce ngetintfo letibalulekile kubo.

[Vakashela i-RX Radio](#)



Ulwazi Lwethu is a Zenex Foundation funded and initiated project to develop a series of graded and leisure African language readers and teacher support materials. This project is targeted at teaching and supporting learners in the Foundation Phase to improve their home language reading and understanding. The readers have been originated in nine African languages in collaboration with Molteno Institute for Language and Literacies, Nelson Mandela Institute for Education and Rural Development, Room to Read South Africa, and Saide. All resources are developed as Open Education Resources (OER).



basic education

Department:
Basic Education
REPUBLIC OF SOUTH AFRICA

*The Ulwazi Lwethu readers and storybooks have
been quality assured and approved by DBE.*

Your attribution should include the following:

Title: Umhlangano wemndeneni

Author/s: African Storybook

Translator/s: Simangele Khoza

Illustrator/s: Thulisile Shongwe

Assurer/s: Mduduzi Benjie Shongwe

Language: Siswati



© Zenex Foundation - Saide 2025 (Updated Edition)

CC BY includes the following elements:

BY – Credit must be given to the creator

